

四庫全書

史部

欽定四庫全書

經義考卷八十九

翰林院檢討朱彝尊撰

書十八

鄭公曉尚書考

二卷

闕

徐文貞公志墓曰公諱曉字室甫別號淡泉海鹽人

嘉靖壬午舉浙江鄉試第一明年中會試授兵部職  
方主事以議大禮杖闕下起考功郎中嚴世蕃以治  
中求為尚寶丞公謂非故事不聽貶和州判入為太  
僕丞遷為考功郎中又遷南尚寶卿歷南太僕少卿  
鴻臚光祿太常卿遷刑部右侍郎改兵部出撫鳳陽  
選民兵集鹽場壯勇禦倭於通泰襲之於如臯擊之  
於海門搗之於呂泗圍之於狼山斬首九百餘級入  
為吏部左侍郎尋遷南京吏部尚書世宗以公知兵

留為右都御史協理戎政改刑部尚書分宜譖公自  
專落公職及公卒分宜得罪去世宗詔復公職今皇  
帝嗣統賜祭塋贈太子少保謚端簡

按書考一冊彙尊得之公家失其上卷中多  
辨證古文之非蓋公自撰也

林氏

雲同

尚書正宗

未見

盛子鄴曰林雲同號退齋莆田人嘉靖癸未進士改

庶吉士累官南京刑部尚書贈太子少保謚端簡

葉氏良珮讀書記

未見

豐氏坊古書世學

六卷

存

顧炎武曰五經得於秦火之餘其中固不能無錯誤  
學者不幸而生乎二十餘載之後信而闕疑乃其分

也近世之說經者莫病乎好異以其說之異於人而  
不足以取信於是舍本經之訓詁而求之諸子百家  
之書猶未足也則舍近代之文而求之遠古又不足  
則舍中國之文而求之四海之外如豐熙之古書世  
本尤可怪焉鄞人言出其子坊偽撰曰箕子朝鮮本  
者箕子封於朝鮮傳書古文自帝典至微子止後附  
洪範一篇曰徐市倭國本者徐市為秦博士因李斯  
坑殺儒生託言入海求仙盡載古書至島上立倭國

即今日本是也二國所譯書其曾大父河南布政使  
慶錄得之以藏於家按宋歐陽永叔日本刀歌徐福  
行時書未焚逸書百篇今尚存蓋昔時已有是說而  
葉少蘊固已疑之夫詩人寄興之詞豈必真有其事  
哉日本之職貢於唐久矣自唐及宋歷代求書之詔  
不能得而二千載之後慶乃得之其得之又不以獻  
之朝廷而藏之家何也至曰箕子傳書古文自帝典  
至微子則不應別無一篇逸書而一一盡同於伏生

孔安國之所傳其曰後附洪範一篇者蓋徒見左氏傳三引洪範皆謂之商書而不知王者周人之稱十有三者周史之記不得謂商人之書也禹貢以道水道水移於九州之前此不知古人先經後緯之義也五子之歌為人上者奈何不敬以其不叶而改之曰可不敬乎謂本之鴻都石經據正義言蔡邕所書石經尚書止今文三十四篇無五子之歌熙又何以不考而妄言之也夫天子失官學在四夷使果有殘編



斷簡可以裨經文而助聖道固君子之所求之而惟恐不得者也若乃無益於經而徒為異以惑人則其於學也亦謂之異端而已愚因歎夫昔之君子遵守經文雖章句先後之間猶不敢輒改故元行冲奉明皇之旨用魏徵所著類禮撰為疏義成書上進而為張說所駁謂章句隔絕有乖舊本竟不得立於學官夫禮記二戴所錄非夫子所刪況其篇目之次元無深義而魏徵所著則又本之孫炎以累代名儒之作

申之以詔旨而不能奪經生之所守蓋唐人之於經傳其嚴也如此故啖助之於春秋卓越三家多有獨得而史氏猶譏其一本所承自用名學謂後生詭辨為助所階乃近代之人其於讀經鹵莽滅裂不及昔人遠甚又無先儒為之據依而師心妄作刊傳記未已也進而議聖經矣更章句未已也進而改文字矣此陸游所致慨於宋人而今且彌甚徐防有言今不依章句妄生穿鑿以遵師為非義意說為得理輕侮

道術寢以成俗嗚呼此學者所宜深戒若豐坊之徒  
又不足論也

陸元輔曰古書云者以今文古文石經列於前而後  
以楷書釋之且采朝鮮倭國二本以合於古本故曰  
古書也世學云者豐氏自宋迄明四世學古書稷為  
正音慶為續音熙為集說道生為考補故曰世學也  
續音中多異聞新說其序云正統六年慶官京師朝  
鮮使臣媯文卿日本使臣徐睿入貢因召與語二人

皆讀書能文辭議論六經疊疊出人意表因以尚書  
質之文鄉曰吾先王箕子所傳起神農政典至洪範  
而止虞曰吾先王徐市所傳起虞書帝典至秦誓而  
止又笑官本錯誤甚多孔安國偽序皆非古經之舊  
如虞書帝告紀堯舜禪授之事汨作紀四凶之過九  
共紀四岳九官十二牧考績之事橐籥紀后稷種植  
之法序皆不知吾國之法有傳古經一字入中國者  
夷九族使臣將行搜檢再三遣兵衛之出境則六一

翁令嚴不許傳中國者不信然歟固請訂其錯誤僅錄一典二謨禹貢盤庚泰誓武成康誥酒誥洛誥顧命見示謹錄附先清敏公正音之下俾讀是經者尚有考於麟角鳳毛之遺雋云又曰梁姚方興妄分堯典舜典為二篇伏生今文孔安國古文鴻都古經魏三體石經合為一篇止名堯典箕子朝鮮本徐市倭國本總作帝典與子思大學合王魯齊王深寧皆以為最是今從之考補云姚方興本齊篆主蕭道成之臣

偽增曰若稽古帝舜曰七字於重華之上變亂其文  
分為二典於建武二年上之後事纂主蕭衍以罪見  
誅箕子封於朝鮮傳書古文自政典至微子而止後  
附洪範一篇徐市為秦博士因李斯坑殺儒生託言  
入海求仙盡載古書至島上立倭國即今日本是也  
二國所繹書經先曾祖通奉府君與楊文懿公皆嘗  
錄得以藏於家觀其序說依託之迹顯然鄧人萬斯  
大曰此吾鄉豐禮部廢棄於家窮愁著書而偽託者

名為世學其實一手所為五經皆有偽撰不獨古書也吁可怪哉

黃氏

光昇  
讀書愚管

未見

姓譜黃光昇字明舉晉江人嘉靖己丑進士歷刑部

尚書

黃氏

靈

書經便註

十三卷

萬卷堂目十卷

未見

姓譜霰字天章寧晉人嘉靖己丑進士授行人選御  
史以言事與楊爵等繫獄罷歸教授鄉里人稱汶濱  
先生

沈氏

朝宣

書經發隱

未見

繆泳曰朝宣字三吾仁和人嘉靖辛卯舉人

錢氏

應揚

尚書說意



未見

蔣方馨曰後楓錢氏應揚餘姚人嘉靖壬辰進士

王氏問書經日抄

未見

蘓州府志問字子裕無錫人嘉靖壬辰進士歸里六年然後殿試除戶部主事歷廣東按察司僉事

蔣氏騰蛟書傳折衷

六卷

未見

李因篤曰渭南人嘉靖乙未進士

胡氏賓書經全圖

一卷

未見

按賓光州人嘉靖乙未進士書載山陰祁氏

澹生堂目

馬氏森書傳數言

十卷

存

姓譜森字孔養福建懷安人嘉靖乙未進士歷戶部尚書子欽曰書傳敷言先恭敏為諸生時所著也三山故鮮習是經者嘉靖乙酉督學邵公銳拔取進士內二十有八人改習之延莆田林公學道受業先公師承其說鑽研敷衍浹期成帙及官大司徒明農後方付梓行於世崇禎丙子鄰弗戒於火收拾煨燼之

餘得數言若干版付際明藏之際明蒐補復為完書  
孫際明曰先恭敏所著有四書口義春秋伸義春秋  
辨疑易經說義輯禮書傳數言奏疏地理正宗文集  
若干卷惟文集版係不肖際明收藏無恙頃見書傳  
數版奚忍目擊殘缺隨拮据次第編補亦以質同業  
者之敦尚云爾

張雲章曰森亦守心學之說而與朱蔡有違言者觀  
其疏虞廷十六字可見其書嘉靖癸亥門人張科序

之其孫際明重刊沈履祥序之

陳氏言書疑

未見

言自序曰經之行於世者未有若書之闕誤者也上  
下五十九篇吾讀今文焉然而何詰曲也吾讀古文  
焉然而何萎薈也吾衡觀於二帝三王之異代焉然  
而其文何較若二體也吾茲惑焉而姑就所傳述以  
考釋之則諸儒訓注何異同也合異同而會通之吾

將以蔡氏為歸焉而疑且殆者何蝟毛起也邈授受而折衷之吾必以紫陽氏為宗焉而何書注之弗果即所訂定者僅二典而止也吾又以質之繼紫陽而興者若慈湖文正諸君子焉而疑義何縷縷也無已則研精覃思而持衡其間本以家所世業日記篇額者參伍而裁酌之其於蔡傳比而同之不為黨攬而正之不為嫌以成紫陽之遺而暢未盡之旨命其草曰書疑疑之者翼之也噫業蔡而疑蔡又安知後之

疑吾不尤甚於今之疑蔡也

莫氏

如忠

尚書訓詁大旨

未見

江南通志莫如忠字子良華亭人嘉靖戊戌進士歷

浙江布政使

陸氏

穩

書經便蒙詳節

未見

蔣方馨曰北川陸氏穩歸安人嘉靖甲辰進士累官

兵部侍郎

譚氏綸書經詳節

未見

姓譜綸字其理宜黃人嘉靖甲辰進士歷官太子少

保兵部尚書謚襄敏

吳氏文先尚書審是

十卷

未見



張氏居正書經直解

八卷

存

錢與暎序曰傳曰自天子至於庶人壹是皆以修身  
為本修身之道孰要於明經哉六經之道同歸而宏  
綱大要足以垂世立教又莫要於典謨訓誥誓命之  
文為人君而建極馭宇不可不知書為人臣而為德  
為民不可不知書為庶人而遵由道路不可不知書

自漢興立在學官諸家註互相同異至紫陽朱先生  
獨授蔡氏為傳高皇帝制科取士詔遵其說著為功  
令自是師弟講明篇章益衍今上冲年嗣位江陵公  
倡率儒術輯為一編既資日講且備睿覽融古人之  
傳記質近日之異同存是去非削繁增簡詞富而備  
義弘而雅萬厯丙戌不佞偕計得之京邸歸授家庭  
兒周刊行傳之通都大邑刊成映不佞略序其端如  
此萬厯十八年庚寅秋九月

湖廣通志居正字時大江陵人嘉靖丁未進士改庶  
吉士由編修歷宮坊掌院隆慶初以禮部侍郎召入  
內閣官至太師左柱國吏部尚書中樞殿大學士卒  
諡文忠追論削籍崇禎中有詔追復

王氏撫尚書日記

十六卷

存

樵自序曰傳尚書者非一家至蔡先生集傳宗本程

朱義始益精而學者罕窮其歸趣何也經文簡要事  
理兼陳非不該不徧之學輒能通貫孟子曰誦其詩  
讀其書不知其人可乎是以論其世也蓋以詩書所  
載皆其人之實讀其書如身在其時論其世如事在  
於已則我之心即古人之心古人之心即我之心然  
後所謂知其人者可得而幾也吁豈易言哉今去聖  
人之世雖遠而其心固在故居千載之下可仰而求  
有不求未有求而無得者也予未有得而不敢不求

者也敬授橫渠張子劄記之法但以自驗所進日久成帙遂編次之初不敢以傳之人人然此學人之所共有願觀者則出之倘讀而頗亦有契焉者乎則以是為適國之舟車送者自岷而反奚不可者

李維禎序曰書有古文今文而今之解書者又有古義時義明高皇帝嘗御注洪範命學士劉三吾等為書傳會選其後有直指輯注會通纂義疏意書繹數十家是為古義而經生科舉之文不盡用自書經大

全布在學官獨重蔡氏注經生習之其主蔡氏而為  
之說者坊肆所盛行亦數家皆便科舉之文是為時  
義惟金壇王中丞公日記哀錄百家訓詁於經旨多  
所發明而亦可用於科舉之文其中若精一協一建  
中建極禹箕衍疇之法湯尹談理之宗召誥周官之  
義微箕抱器受封周公居東致辟之辨本原學術窮  
究性命昭揭倫常破除誣罔有功於經不小也

張萱曰萬厯間金壇王樵著上自義黃之紀洎於稗

官即今士大夫譚議凡有當於尚書者皆參攷之凡十六卷

張雲章曰方麓先生日記字比句櫛討論折衷或並存衆說或定從一家必求至當之歸而於歷象璣衡地里皆詳稽而得其依據有明一代以尚書之學著聞者絕少而異說雜出若梅鷟之流狂悖尤甚朱蔡之傳賴先生以不墜云

書惟別記

四卷

存

張雲章曰此亦為舉業而作萬厯甲申六月自為之  
序行之

俞氏時及

蔡傳說意

未見

蔣方馨曰濛泉俞氏時及新昌人嘉靖丁未進士

李氏

儒烈

尚書啓蒙



未見

蔣方馨曰見川李氏儒烈海鹽人嘉靖丁未進士

湯氏日新尚書錄

未見

蔣方馨曰練川湯氏日新秀水人嘉靖庚戌進士

呂氏穆書經講意

未見

蔣方馨曰字岡呂氏穆秀水人嘉靖癸丑進士

曹氏大章書經疎見

未見

蔣方馨曰含齋曹氏大章金壇人嘉靖癸丑進士

陳氏錫尚書經傳別解

一卷

存

張雲章曰臨海陳氏所撰

吳氏福書傳

十卷

未見

陸氏

相儒

尚書正說

未見

蔣方馨曰雨樓陸氏相儒嘉興人嘉靖己未進士

陳氏

言

尚書講義

六卷

未見

黃虞稷曰言字宜易莆田人嘉靖己未進士廉州知府

申氏時行書經講義會編

十二卷

存

時行自序曰余羈卹受尚書是時吳中大師治尚書者少乃從書肆中求疏解訓義手自採錄積數年至若干卷既以詞臣久次橫經勸講日侍今上於帷幄

所進尚書直解雖分日更撰而余以專經刪訂為多  
今內府所刊書經直解是已蓋余向所採錄第以舉  
業從事多尋章摘句拘牽藝文而廣廈細旃之上直  
以闡發大旨剖析微言要在啓沃聖聰敷陳理道不  
為箋疏制義所束縛其簡切明暢有不待深思強索  
而昭然者獨是書藏於禁中惟閣臣講察乃蒙宣賜  
學士大夫罕獲覩焉余甥李漸鄉鴻從余邸第得而  
讀之因與懋嘉兩兒共加裒輯合余前所採錄共為

一編於是尚書大義論說衍釋粲然備矣

江南通志時行字汝默長洲人嘉靖壬戌狀元以修撰歷官詹翰以吏部左侍郎入直東閣官至少師吏部尚書中極殿大學士為元輔九年而歸歸二十有三年壽八十考終於里第

徐乾學曰長洲申文定公以舉子時所業及講筵所進合輯成編今博士家多習其書

歸氏有光尚書叙錄

存

有光自序曰有光少讀尚書即疑今文古文之說後見吳文正公叙錄忻然以為有當於心揭曼碩稱其網明目張如禹之治水信矣自是數訪其書未得也已亥之歲讀書於鄧尉山中頗得深究書之文義益信吳公所著為不刊之典因念聖人之書存者年代久遠多為諸儒所亂其可賴以別其真偽惟其文辭格製之不同後之人雖悉力模擬終無以得其萬一

之似學者由其辭可以達於聖人而不惑於異說今  
伏生書與孔壁所傳其辭之不同固不待於別白而  
可知昔班固藝文志有尚書二十九篇古經十六卷  
古經漢世之偽書別於經不以相混蓋當時儒者之  
慎重如此而唐初諸臣不能深考猥以晚晉襍亂之  
書定為義疏而漢魏專門之學遂以廢絕朱子蓋有  
所不安而未及是正吳公實有以成之而今列於學  
官者既有著令縉紳先生莫知廣石渠白虎之異義



學者蹈常習故漫不復有所尋省以數百年雜亂之書表章於一代大儒之手而世亦莫能尊信之可嘆也已余未見吳公書乃依倣其義釐為今文如左而存其叙錄於前以俟他日得公書參考焉

經義考卷八十九

欽定四庫全書

經義考卷九十

翰林院檢討朱彝尊撰

書十九

程氏 弘賓 書經虹臺講義

十二卷

存

弘賓自序曰今之經生治書者自蔡傳外率祖閩中

所刻心法正宗資講精蘊諸家之說歷時既久海內  
操觚之士各出意見辭與理融義與經合於典謨訓  
誥之奧得其肯綮殆有超於閩刻諸書之外者賓幼  
受讀是經閱歷寒暑今亦有年蓋嘗三復舊說博採  
師友之聞見如屠道南研幾錄張潤江錦囊錄沈虹  
野徐瑤泉諸講說羣聚而折衷之積以歲時集成尚  
書講義不欲自私鳩工梓之以畀同志嘉靖甲子孟  
春

蔣方馨曰鍾山程氏著尚書講義

索氏

仁

尚書砭蔡篇

一卷

未見

仁自序曰襄兒就塾師習尚書專求通蔡氏傳為案  
據余考國朝典令書主古疏兼蔡傳初未嘗專主蔡  
也學者以注疏繁而難閱遂棄不觀然而非制矣余  
弱冠時曾誦壁經正文至是始取蔡氏閱之則悖理

者種種也因博考先儒舊說參以己意正其謬誤揭之家塾

沈道原序曰昔伏生從負圖先生受書以繩繞於腰領一誦一結十尋之繩竟而誦習不已要亦尋繹其義耳近世習書者為舉業地彼其意在魚兔而又奚筌蹄為吾舅袁葭波先生世為鉅儒耻舉業而托之醫於尚書有砭蔡編書自伏生之女句讀而授之鼂錯其後孔安國鄭康成諸人為之詮解凡百有三十

家至宋而衷於蔡仲默吾明遂布之學官蔡何砭也  
非蔡淺書固真爾世有蔡郎有砭蔡者道無涯也

杜氏偉尚書說意

未見

蔣方馨曰靜臺杜氏著說意

俞氏鯤百家尚書彙解

未見

陸元輔曰鯤字之鵬

林氏

鴻儒

書經日錄

未見

閩書鴻儒字允德安溪諸生精治尚書郡人士治書

者皆從之

屠氏

本峻

尚書別錄

六卷

存

韓氏

綱

書經廣說

未見

廣信永豐志韓綱字正夫以歲貢授臨湘教諭

鄧氏元錫尚書繹

二卷

存

劉氏文卿尚書便蒙纂註

未見

章氏潢尚書圖說



三卷

存

陳氏第  
尚書疏衍

四卷

存

第自序曰少受尚書讀經不讀傳注讀愈專篋中積至十餘冊無不字句磨滅默誦嘗不遺一字口誦心維得其義於深思者頗多近因宋元諸儒疑古文偽

作竊著辨論數篇因復取古今注疏詳悉讀之意所  
是者標之意未安者微釋之句讀未是者正之其素  
得於深思者附著之間又發揮於言外以俟後世冀  
修己治人者實有取於經徵諸行事而已矣

羅氏敦仁尚書是正

二十卷

存

子喻義序曰書百篇尼父所定虞夏書二十篇商書

四十篇周書四十篇書序是也秦時禁挾書博士伏生壁藏之禁解求其書亡數十篇獨得二十八篇以教於齊魯之間掌故晁錯寫以隸古是為今文時人惟知尚書二十八篇取象二十八宿不知其有百篇也既而偽秦誓百兩篇之屬稍出然不大行惟孔氏有古文尚書學安國以今文字讀之因以起其家逸書得二十五篇蓋尚書滋多於是矣百兩篇者出東萊張霸採左氏傳書序為作首尾凡百二篇孔氏古

文吾不能知而採傳序作首尾猶百兩也庸疴乎或  
曰書何以有偽也曰漢時有經學各欲名家至有行  
金易中書漆經以合其私說者而人主以尚書為樸  
學不好懼且中廢汾陰寶鼎周漢孰辨是以趨為偽  
而不辭安國書未上不列學官故蔡邕所勒石經仍  
今文而古文至東晉始盛行於世夫其是也二十八  
篇已足矣如其非也多亦奚為王通氏言書殘於古  
今蓋傷之也先君贈公家世受書補博士弟子已乃

棄去不交人事者二十年靜中有獲時著筆札小子  
謹識之鈔集成書是為尚書是正大率原本今文首  
列書序次載本書次下已意亡者闕之而散見論語  
左國孟荀者附錄焉非是族也雖世所稱十六字不  
敢不正翦却梧桐枝灑湖方可窺先君誦之云爾予  
小子承厥志也

張雲章曰是正云者正經正傳正字正句正術也其  
正術之說曰書者道政事者也人心惟危道心惟微

分形氣義理之名德無常師善無常主標萬殊一本  
之目此則講堂義理之書非道政事之書也信如此  
言則義理與政事果可判而為二乎又以允執其中  
補書之亡而曰中之言空也空不可持其中安在執  
之何法就令執之當其舍時頓放何處此以禪家機  
鋒語說書矣又舉中庸執其兩端用其中於民釋之  
而曰中也者天下之至虛也不言心也兩也者天下  
之至化也不言一也用也者天下之至賁也不言精

也其意以人心道心惟精惟一為非經語以千百年聖作明述之書而一旦欲滅裂之可乎

陳氏履祥尚書極

一卷

未見

余氏懋學尚書折衷

未見

繆泳曰余懋學字行之婺源人隆慶戊辰進士歷戶

部侍郎贈工部尚書

張氏位尚書講略

未見

王猷定曰南昌洪陽張公中隆慶戊辰進士改庶吉

士累官禮部尚書兼文淵閣大學士

鍾氏庚陽尚書傳心錄

七卷

存



王樵序曰六經中惟書最古博士家蓋難言之余家世業是經少嘗受讀粗得其文義晚而味之乃始有悟時時為子弟說之然其詞不能不多今觀鍾先生書說則約而該瞻而覈盡述其父學山公之訓而筆之簡者也先生守鎮愛民作士有古循良風而出之以真誠養之以鎮靜湛恩濺澤淪洽於四境莊生曰書以道政事夫書之於政事如詩之於性情皆在我而已故未有不得於心而能神明其迹以見於用者

也先生父子自相師承而又以其所會心者成一家  
言會通其聾牙難解之語而出之以明易使人如見  
蓋長於經學者也學者得此篝火明燭而行乎屈曲  
之途可無顛躓之虞矣萬曆辛巳五月

王肯堂跋曰大江之南以尚書起家者莫盛於樵李  
當嘉靖中學山鍾先生以名儒為斯文盟主綴學之  
士執經而質難者常數十人隆慶之初吾師西星先  
生始登春官高第而先生亦將貢京師已乃受璽書

封如子官又十餘年而吾師受命來為潤州牧則迎  
養於郡齋時起居小不適則召肯堂診始得一望見  
省宇益退而歎仰者累日吾師既以良二千石為明  
時倚重發抒先生蓄積而又時時念先生學為儒宗  
莫遇賞音即列職郎署而不及以身効每以語肯堂  
輒不怡者久之噫先生之所養與吾師之所以事先  
生者可知也已而吾邑諸生得一編則吾師之所趨  
庭而得者儼然在焉邑侯劉公見而悅之以金壇之

治尚書者十戶而九也謂是書足為指南顧諸生按而傳之四閱月而工成焉樵李之說經者屠氏之研幾鄭氏之題旨皆能味經之腴不囿宿見嗣是而後寥寥焉是編出足集其成哉

俞汝言曰鍾庚陽字西星秀水人隆慶戊辰進士除太平府推官入為大理寺評事陞工部主事歷員外郎中出知鎮江府謫廣德知州遷刑部員外卒

張雲章曰此雖帖括之書然猶足錄庚陽為鎮江守

王方麓序其書謂其父子相師承又以其得之心者會通其聲牙難解之辭而出以明易使人如見庚陽父名天才老於經學口授庚陽而述之為書者也

沈氏位尚書筆記

未見

蔣方馨曰虹臺沈氏著尚書筆記

俞汝言曰位吳江人隆慶戊辰進士改庶吉士授檢討卒於邳州

龔氏勉書義卓見

未見

嚴繩孫曰勉號毅所無錫人隆慶戊辰進士官至浙江右布政使

汪氏在前讀書拙見

未見

蔣方馨曰雅堂汪氏在前歙縣人隆慶戊辰進士

陸氏光宅尚書主說

未見

蔣方馨曰雲臺陸氏有主說

鍾嶽立曰光宅平湖人隆慶庚午舉人

張氏

元忬

讀尚書考

未見

人物考張元忬字子蓋號陽和山陰人隆慶辛未賜  
進士第一除翰林院修撰遷左諭德兼侍講所著有  
讀尚書考讀詩考

王氏 祖嫡 書疏叢抄

一卷

存

黃虞稷曰祖嫡字師竹信陽州人

一云德州人

隆慶辛未

進士改庶吉士授檢討陞國子監司業遷司經局洗

馬終右庶子

方氏 楊 尚書集解

未見



吳璵曰楊字初庵歙縣人隆慶辛未進士杭州知府  
瞿氏九思書經以俟錄

六卷

存

史學遷序曰曩瞿子以書來謂帝王之學與常布異  
以故行年且六十終不敢談尚書然今觀其所論著  
以天道人道君道臣道世道治道釐為六部論篇章  
次第則以為世運相遞而下自不得無此篇章運在

此則篇章亦當在此而徐觀其聯絡之勢信纍纍如貫珠然後知尚書之篇章果秩然不可移易其論篇名則以為待人而成有聖君有聖臣自不得無此篇名而參考於無篇名之君臣則皎皎闕若觀火然後知尚書之篇名果犖然不可增損且其以洪範為範圍治道之本尤為卓有綱維而又謂後世君臣不當覽觀前史恐前史有敗度敗禮悖淫匪彛諸所行事令後世臣主覽觀後反若樹之的而久將漸漬而從

之乃摘尚書有裨君德臣道治道諸語為綱而稍取  
考亭綱目所紀載係於其下使人但見其綱而不能  
遽覩其敗度敗禮愾淫匪彛之實及其以紀傳為質既見  
其敗度敗禮愾淫匪彛之實而又已見考亭之書法  
謂如此則是如此則非如此則吉如此則凶時必有  
惕然深省必不敢復敗度敗禮愾淫匪彛者其有功  
於萬世君臣可勝道說哉吾是以令有司趣刻之

高世泰曰瞿九思字睿夫黃梅人從學羅洪先耿定

向歷主鹿洞濂溪岳麓石鼓四書院中萬歷癸酉舉  
人罹冤獄得解為民還里尋論學於河南廣東作中  
庸口授中庸位育圖中庸運卦古樂測孔廟禮樂考  
至聖榮哀考六經以俟錄洪範衍義歷正諸書徵授  
翰林院待詔謝不赴詔歲給米六十石以資著述乃  
撰明詩擬萬歷武功錄長吏為起江漢書院居之

蔡氏立身刪補書經註

未見

溫州府志蔡立身字師曾浙江平陽人萬曆癸酉舉人高唐知州

姚氏舜牧書經疑問

十二卷

存

舜牧自序曰書教至有宋諸儒闡發殆盡將安所置疑又安所致問哉蓋書無可疑而所以說書者或稍失其故也則管窺蠡測之說苟有可與天下共疑者

未必非聖賢之所與矣余今所疑未嘗求異於傳注  
惟必求其是終歸於無疑與天下萬世共知共由之  
耳然此可傳之學究哉藏之名山可也萬厯甲辰四  
月

孫氏繼臯尚書意解

未見

嚴繩孫曰孫繼臯字原闕無錫人萬厯甲戌進士第

一厯官吏部左侍郎

馮氏夢禎 尚書大意

未見

俞汝言曰馮夢禎字開之秀水人萬曆丁丑進士歷  
官國子監祭酒

沈氏自邠 尚書表引

未見

俞汝言曰沈自邠號几軒秀水人萬曆丁丑進士改

庶吉士授檢討歷修撰

楊氏起元書錄

未見

姚瀚曰起元字復所歸善人萬厯丁丑進士改庶吉士歷官吏部右侍郎兼侍讀學士

陳氏泰交尚書注考

一卷

未見

俞汝言曰陳泰交號長水平湖人萬厯丁丑進士由



順天府儒學教授陞國子監博士歷禮部精膳司員外降饒平縣典史

項臯謨曰高皇帝明經比士詔用古注疏不知罷於何年豈自文皇纂修大全後乎大全首經文次傳注後附諸說意深遠矣同情治尚書編注考其嘉惠學者豈小補耶

鍾氏化民尚書臆見

未見

鄒氏龍光書經約言

未見

蔣方馨曰斗墟鄒氏龍光長洲人萬厯庚辰進士

劉氏應秋尚書旨

十卷

存

蔣方馨曰兌陽劉氏應秋吉水人萬厯癸未進士第

三人歷國子監祭酒

湯氏顯祖玉茗堂尚書兒訓

未見

江西通志顯祖字義仍臨川人萬歷癸未進士除南太常博士稍遷南祠郎抗疏劾政府謫徐聞典史量

移知遂昌縣

潘氏士藻尚書心鏡

未見

徐氏即登書說

十卷

未見

陸元輔曰即登號匡岳豐城人萬曆癸未進士除工部主事歷河南左參政著書說凡四冊

郭氏正域東宮進講尚書義

一卷

存

姜氏鏡書經見解

未見

毛奇齡曰姜鏡字翼龍山陰人萬厯癸未進士歷官

廣東布政使

何氏喬遠書經釋

一卷

未見

沈氏瓚尚書大義

未見

潘耒曰璣字

原闕

吳江人萬歷丙戌進士


袁氏

宗道

尚書纂注

四卷

存



經義考卷九十

# 欽定四庫全書

史部

經義考卷九十一至  
四

詳校官編修<sub>臣</sub>李堯棟

編修<sub>臣</sub>程嘉謨覆勘

總校官知縣<sub>臣</sub>繆琪

校對官編修<sub>臣</sub>勵守謙

謄錄監生<sub>臣</sub>懋意誠



欽定四庫全書

經義考卷九十一

翰林院檢討朱彝尊撰

書二十

董氏

其昌

書經原旨

未見

卞洪勲序曰今之治書者率多承襲傳會又或標奇逞臆經學之厄甚矣雲間董玄宰氏以尚書起家獨

深得其旨凡疏義箋解皆虛心闡繹勒為一家言令  
觀者劃然解頤也昔鄭寬中入說尚書於金華成帝  
詔班伯受之賞賚甚渥以其剖析經義不昧作者之  
旨耳若玄宰氏固已詣古人之奧室矣

吳氏炯書經質疑

一卷

存

炯自跋曰余於六籍易有繹旨詩春秋有質疑禮有

孝經以輯其遺逸有大學以訂其章句而獨缺尚書  
嘗曰帝王之大經大法義本直截故無辨難之辭雖  
然終未卒業也今採叢語所載及間居酬應之言凡  
有關於四代者輯成一編自古文後出談經者失其  
統緒互有牴牾故於傳注居多雖未能章分節解庶  
幾少補其缺云萬厯庚申秋七月

王氏肯堂尚書要旨

三十一卷

存

張雲章曰金壇損齋王氏中丞樵之次子萬厯己丑  
進士改庶吉士除翰林院檢討要旨一書館中所撰  
其從兄爾祝守滄州為之鋟版天津兵備副使張汝  
蘊序之蓋原本家學而為學士家刺經訓故之用者  
也

郝氏敬尚書辨解

十卷

存

張雲章曰京山郝氏專信今文而力辨孔傳為非且以周公未嘗有東征殺管叔之事亦未嘗有踐阼朝諸侯之事蔡仲之命致辟管叔乃誤解金縢中我之弗辟一句禮記明堂位周公朝諸侯誤解洛誥中周公誕保文武受命惟七年之文其意以孔書偽作禮記出於漢儒俱不足信其旨似出吳幼清纂言而郝氏於纂言又未之見不過率其私智臆說而本無所

據也

黃虞稷曰前八卷解今文二十八篇後二卷辨正古

文

范氏應賓壁業

未見

姚翰曰范應賓字光父秀水人萬厯壬辰進士工部

主事

鍾氏鳴陞書經素言

未見

蔣方馨曰抱瑜鍾氏鳴陞丹陽人萬曆壬辰進士刑

部主事

盧氏

廷選

尚書雅言

六卷

存

湯顯祖曰學古堂尚書雅言採唐孔氏以後至宋蔡氏所詁而折衷己意存其異同有疏通知遠之益蓋

深於書者

高兆曰廷選字真常莆田人萬歷壬辰進士歷官湖

廣叅政

曹氏學詮書傳會衷

十卷

存

張雲章曰天啓中先生官廣西右叅議魏忠賢黨摘其所撰為謗書除名為民崇禎中復起廣西疏辭家



居殉節死此書大槩即蔡傳而損益之

賀氏燦然書略

未見

俞汝言曰燦然字伯闇秀水人萬厯乙未進士除行

人陞吏部主事歷員外郎

胡氏瓚尚書過庭雅言

未見

陳繼儒曰桐江胡伯玉先生官工部郎出叅江右藩

遂還環山少受澤庵公訓用尚書起家晚課諸子博  
采經史以及山鑿家刻旁證之二十年始成題曰過  
庭雅言志先訓也

陳忱曰瓚字伯玉桐城人萬厯乙未進士官至江西  
布政司叅政

史氏記事尚書疑問

五卷

未見

洪氏翼聖尚書祕旨

未見

蔣方馨曰南池洪氏翼聖歙縣人萬厯戊戌進士

謝氏廷讚書經翼注

七卷

存

俞汝言曰廷讚字曰可金谿人萬厯戊戌進士官尚

寶司丞

王氏

建中

尚書新說

未見

姚瀚曰山陰人字位字萬厯戊戌進士山陽知縣

趙氏

維寰

尚書蠡

四卷

存

董其昌序曰我明以經術取士士之治尚書者閩推  
莆田浙推馮李若黃學士蔡陽馮司成開之陳宮詹

孟常皆用尚書名世其所論譔經生家奉之不啻天  
球弘璧也吾友趙無聲歲庚子用尚書冠北闈余嘗  
謂書道政事即唐虞三代之史體兼編年紀傳凡律  
厯兵刑河渠食貨諸治典靡不畢具故深於書者必  
精於史無聲向有史癖下上三千年間日取其興亡  
治亂之故而表以典謨訓誥之理淹晰貫串直合經  
術治術而一之矣頃無聲官留曹與余兒同舍出其  
講義付諸剞劂士題其端曰蠡讀是編者毋徒藉為嫁

衣可也崇禎乙亥秋七月

鍾淵映曰維寰宇無聲平湖人萬厯庚子鄉試第一  
署海寧儒學教諭遷南國子監丞轉刑部主事歷郎  
中著尚書蟲讀史快編

孫氏奇逢書經近指

未見

湯斌志墓曰康熙十有四年四月明萬厯庚子舉人  
徵君孫先生卒於輝縣夏峰之居年九十有二其冬

十月葬於夏峰之東原先生幼當梁谿吉水講學都門之日與鹿忠節公交修默證以聖賢相期許忠節既歿獨肩斯道者四十載兩朝徵聘十一次堅卧不起故天下稱為徵君云先生字啓泰號鍾元容城人

黃氏

景星

尚書解

未見

陳萬言序曰自唐及宋說書者不一家蔡註一出頗為簡備昭代令甲壹以是為宗人習專經家無異說

顧標詞立義者日繁縱於訓詁不盡齟齬可信為定則則未也吾師黃若頃先生以莆中尚書名家成進士自赤城李入儀曹寅清之暇乃得研精抽秘博考故義叅以心裁薈成尚書解一書理簡而該詞弘而雅約文中義大暢宗風所為振起於將來而發皇其未墜者其在斯乎其在斯乎

俞汝言曰黃景星號若頃莆田人萬厯辛丑進士歷官廣東右布政使



來氏宗道尚書祕省

未見

姚瀚曰蕭山人字路然萬厯甲辰進士累官太子太保禮部尚書兼東閣大學士

樊氏良樞書繹

一卷

存

陳氏臣忠書經集意

二卷

未見

按臣忠莆田人萬厯甲辰進士書載祁氏澹

生堂目

陸氏鏤尚書傳翼

十卷

存

陳懿典曰邇來經生專務新說實府氏所訂尚書傳

翼博而不泛深而不僻其見卓其心苦矣

蔣方馨曰長水先生陸實府傳翼之書精研深入多  
發金壇王氏所未逮

姚瀚曰平湖人字開仲都御史萬垓子萬歷丁未進  
士建昌府推官

秦氏繼宗書經彙解

四十六卷

未見

欽定四庫全書

卷九十一

姚瀚曰蘄水人萬厯庚戌進士

張氏爾嘉尚書貫言

二卷

存

陳懿典曰余峰張明府貫言脫稿於課最之暇淺言  
彌深簡言彌廣淡言彌旨

高層雲曰余峰張氏爾嘉青浦人萬厯癸丑進士官  
至浙江右布政使

朱氏道行尚書集思通

十二卷

存

繆泳曰朱道行字簡修海寧人萬厯乙卯舉人其書

自為之序

史氏惟堡尚書晚訂

十二卷

存

姜逢元曰金沙肆尚書者推王中丞父子所著日記  
要旨有功來學今得水部史心南晚訂攷證尤詳

姚瀚曰惟堡字心南仁和籍金壇人萬厯丙辰進士  
官都水司主事

錢氏

大復

尚書旨授

未見

姚瀚曰大復華亭人大學士龍錫之父

項氏

儒

書經大全纂

未見

蔣方馨曰珍亭項氏名儒

鄭氏

若曾

尚書集義

六卷

未見

吳氏

從周

書疑

四卷

未見

黃虞稷曰甌寧人字世憲萬厯中海鹽縣儒學訓導

徐氏

允祿

勉思齋尚書解

未見

陸元輔曰明嘉定徐允祿汝廉撰允祿博學有文名  
屢試不遇厄窮無悶一介不苟取予經史皆有論說  
著述頗多

黃氏

他

尚書精義

六卷



佚

台州府志黃巖人

吳氏

桂森

書說

未見

汪氏

應魁

尚書句讀

六卷

存

顧錫疇曰尚書蔡傳邇來坊刻亥豕混淆汪玄杓余

通家子從余遊遵京本精校詳其句讀令窮經者有指南有志翼經者也

楊氏

肇芳

尚書副墨

六卷

存

馬世奇曰斯編創於金沙楊葆元先生成於其長君公才氏先生為諸生時學使者首拔之上其卷於部至頗為天下式而以首宿老不知者或為扼腕而先

生處之怡然也本凡五易草創始就公才補其滲漏  
其言約而該精而覈深而亮疎而密微而不詭樸而  
不俚所謂集尚書之大成者非歟

張明弼曰葆元先生治尚書僅以明經出仕嘗注經  
解未成而歿厥嗣公才能世其學取先生之書彌綸  
而銓叙之以傳於世

楊廷樞曰楊葆元振鐸婁江率其兩子公才公穎苦  
研經術副墨一編典型在目

洪氏

禹功

尚書揀珠

未見

壽昌縣志禹功字懋鄉天啓元年拔貢生考授州同

知

張氏

睿鄉

書箋

未見

鄭元慶曰睿鄉字稚通歸安人

潘氏

士遴

尚書葦簫

五十卷

存

鍾嶽立曰青蓮潘氏字叔獻烏程人天啓壬戌進士  
授行人崇禎初擢雲南道御史尋謫官福建鹽運司  
知事稍遷大理寺副著尚書葦籥錫山高僉事世泰  
序之

徐氏

大儀

書經補註

六卷

存

曹溶曰大儀字象卿貴溪人天啓壬戌進士歷官雲南按察副使崇禎壬申自序

經義考卷九十一

欽定四庫全書

經義考卷九十二

翰林院檢討朱彝尊撰

書二十一

徐氏可期書經貫言

未見

金華府新志徐可期字烜父永康人崇禎戊辰進士  
除行人擢福建道御史改刑部主事終員外郎

傅氏元初尚書撮義

四卷

存

林胤昌序曰吾郡襟江帶海扁舟上下可以邈泖然  
郡士大夫鮮有為此遊具者漢溪傅子既卜其尊人  
宅兆於漢溪復以一葉作江上岵廬風朝月夕乘潮  
往來而省視焉余問舟中往來所讀何書漢溪曰吾  
幼從父祖讀尚書開卷見放齊舉胤子為千古誦媚



之祖驩堯薦共工為千古朋比之祖當時未設諫官  
知人之哲獨推聖帝然四岳舉舜未嘗論賞薦鯀不  
效未嘗議罪吾忝諫官每念二祖列宗用人行政之  
大克媲美於典謨因撮史合經名為撮義夫猶是幼  
從父祖所讀尚書也一日林子攜榼舟中與漢溪汎  
遊筍江浯溪溜埕諸勝訪曾子霖寰於法石則撮義  
已成帙刊傳海內矣余既羨漢溪之思奇而才敏志  
孝而願忠顧竊嘆以其娘娘天球之章為坎坎河干

之具因為朗誦說命三篇拜手颺言曰君家傳巖濟  
川作楫亦惟代言納誨啓沃乃心今撮義稱引古昔  
揚乾昭代閑邪陳義足為講筵啓沃之資日者聖天  
子轉圜從諫側席旁求吾子其以尚書進為恭默遜  
志稽古訓之一助巨川之濟有如此舟豈獨借岵廬  
於江上哉曾子曰善請書之為撮義序

元初自跋曰齋頭索居餘忠耿耿輒溫尚書舊聞叅  
合經史要求真實經濟而訓詁經生之習愧未免焉

集中掛漏尚可續增因就正有道繕寫為難遂付之  
剞劂無乃示璞愚陋滋慙矣

俞汝言曰漢溪傅氏晉江人崇禎戊辰進士官給事  
中

袁氏儼儼尚書百家彙解

六卷

存

曹溶曰儼字若思嘉善人崇禎戊辰進士高要知縣

其書董尚書其昌序之

孫氏

承澤

尚書集解

二十卷

存

承澤自序曰註經難註尚書尤難尚書乃夫子之所序定者今傳世有古文今文之不同有艱澁平易之互異漢人言書有百篇今存者僅及其半所存者果盡出於夫子之所序定者乎且易有程子之傳朱子

之本義春秋有程子之傳詩有朱子之集傳大儒著  
述確乎可循程朱俱不註書朱子僅屬之蔡仲默氏  
仲默每註一篇輒請正朱子然止訂二典禹謨遠捐  
館舍其餘未經訂正者果盡合朱子之意乎且漢人  
表章易有數家詩分為四春秋分為五獨以書為樸  
學不好馬鄭諸家俱失傳行世者獨孔安國一傳而  
已余垂髫先人麗澤府君口授周易比長兼習尚書  
尚書不獨治統所屬道統寄焉言心言性言敬實開

萬古理學之宗視諸經為尤要登第後筮仕汴梁故  
宗西亭先生家多經學祕本因得盡讀諸儒書義抄  
貯笥中變後尚有存者退居二十年迴環熟繹因嘆  
書固全經其不死濟南一老於秦始漢高之世留傳  
遺經於文帝之時天也濟南記憶不全者復出於故  
宮殘壁之中天也文有艱澁平易之不一以事非一  
代作非一手如周易四聖繁簡不一詩之正變不同  
三頌簡編之相遠也朱子即不註書而仲默所註或

曾面授意旨況同時有東萊之書說後百年有金仁山先生之表註許白雲先生之叢說其精粹不遜於朱子余舊著集解一編今年屆八旬恐其散逸重加裒益刊之家塾所解多從蔡傳參以東萊其有不合者正以仁山白雲兩先生要歸之明顯暢達而止至於書之有序其言簡古即不出於孔子或出於當日之史官故程子呂子皆尊信之今乃弁於每篇之首以補蔡傳之缺又蔡傳中有日月隨天左旋之說明

初命學士劉三吾修會選一書改正其失左旋之說  
其實不誤此不足為蔡傳病若其考證失真如璿璣  
之璿玉也誤以為珠簡潔二河也誤以為一如此尚  
多又洪範一篇有禹之經有箕子之傳乃俱以為箕  
子之言此其失之大者余故曰註尚書尤難也

史氏煒尚書纂要

未見

廣平府志史煒成安人崇禎癸酉舉人知縣



朱氏朝瑛讀書略記

二卷

未見

江氏旭奇尚書傳翼

二卷

存

旭奇自述曰國家命儒臣收輯大全於以嘉惠來學甚厚自元以前諸儒疏說其不詭於經者業已收之

無遺矣迄今又二百餘年重熙累洽經教益明邇者  
經筵進講則張江陵申吳縣二公為最著他如莫中  
江氏呂字岡氏黃葵陽氏袁了凡氏孫柏潭氏顧涇  
陽氏張侗初氏周玉繩氏諸所詮說皆不可磨旭奇  
研索十年刪繁補漏名曰傳翼又五年而始成編時  
萬曆戊午歲

陸元輔曰旭奇字舜升婺源人以貢入太學授安岳  
簿移台州衛經歷

顧氏懋樊桂林書響

十卷

存

繆泳曰錢唐顧懋樊書響十卷吳太冲文德翼為之序其曰書響者取孔壁金絲之義也

鄒氏期禎尚書揆一

未見

嚴繩孫曰字公寧無錫人崇禎中御史祁彪佳舉賢

良方正不就學者稱經畬先生

鄒氏期相尚書筆指

未見

孫氏弘祖尚書詮註

未見

嘉興縣志孫弘祖字令弘簡肅公植孫

陸氏又機尚書集解

未見

平湖縣志陸又機字衡如由選貢知日照縣事

陳氏弘緒尚書廣錄

未見

陸氏萬達尚書講略

未見

平湖縣志萬達字天相諸生

龐氏招俊書經正旨

六卷

存

陳忱曰任丘龐招俊脩予輯其孫塏知建寧府事刊行之

唐氏達尚書臆解

未見

鄭元慶曰達字灝如德清貢士里人私諡淵靖先生

沈氏澣尚書印

六卷

存

繆泳曰澣字則新嘉興人舉業書也

姚氏之鳳 尚書定解

未見

平湖縣志姚之鳳字叔瞻諸生

金氏鏡 尚書評注

未見

莊氏 日思 尚書說準

未見

嘉興縣志莊日思字汝立國子監生

朱氏

鶴齡

尚書碑傳

十卷

存

攷異

一卷

存



鶴齡自序曰古經之學非訓詁不明然有訓詁不能  
無異同有異同不能無踳駁他經皆然尚書為甚蓋  
尚書者帝王之心法治法所總而萃也後世大典章  
大政事儒者朝堂集議多引尚書之文為斷義解一  
訛貽害非眇如誤解用牲于郊牛二而世遂有主合  
祭天地及南郊北郊之說者矣誤解九族與罪人以  
族遂有旁及母族妻族而坐之者矣誤解桐宮居憂  
復子明辟而世遂以放君負宸闕為伊周之事矣誤

解金作贖刑始以黃金易黃鉄矣誤解臣妾逋逃始以婦女從軍矣誤以洪範五行牽合庶徵福極而介甫文之遂謂天變不足畏矣誤以弗辟為致辟居東為東征而公孫碩膚之美不白矣誤解弱水在條支崑崙即河源及書序成王伐東夷而漢武之窮兵西北隋唐之越海征遼東馬融鄭玄王肅之徒開闢草萊甚為簡略古文孔傳晚出書義稍顯孔穎達為之疏雖正二劉之失未愜學者之心求其條貫羣言闡

明奧旨信無逾於仲默集傳者但其意主於撥棄注  
疏故名物制度之屬不能無訛筆力視紫陽易詩二  
傳亦多不逮識者不能無憾焉考明初令甲本宗注  
疏蔡傳附之後又以蔡傳未精命儒臣劉三吾等博  
採諸說叅互考訂名書傳會選頒諸學官其後大全  
行而此書遂廢又其後科舉專取蔡氏而大全亦置  
高閣白首窮經仍訛踵陋讀禹貢者河渠遷改眩若  
進風陳洪範者九數相乘迷如辨霧此以攻經生章

句猶隔重山况望其酌古準今坐而論作而行卓然  
稱有用之儒哉余竊用愍嘆此裨傳之所由作也記  
曰疏通知遠而不誣書教也夫推之時務而有宜有  
不宜不可謂通試之異代而或驗或不驗不可謂遠  
列聖經筵進講必首及尚書誠以三五以來崇功廣  
業咸出其中非徒古史記言記事之體余之輯是書  
也主詁義而兼及史家臚羣疑而斷以臆說務為通  
今適用之學庶幾孔堂之金石絲竹不盡至於銷沈

磨滅云爾若以仲默之書羣然尸祝不應輒有異詞  
則余橋舌而退夫仲默作傳已不盡同紫陽之說何  
獨疑於生仲默之後者哉

潘耒曰先生字長孺居吳江之北郭閉戶著書撰述  
甚富所有書裨傳已刊行禹貢長箋尚未雕印

楊氏文彩書繹

十二卷

未見

魏禧序曰楊子書繹既成以授其門人魏禧禧再拜稽首作而嘆曰吾今而知後世之必可以復三代矣楊子曰何為其然也禧曰吾以是書知之夫二帝三王之言天也傳註百家歷象也天之神化不借助於歷象然歷象失占則違天而無以前民用是書也綜百家之是而去其紕駁殫五十年之神明而會通其道故其大義之昭明也如日月之麗天其確乎不可易也如華嶽之峙地其以經世應事也如舟之利水

車之濟陸其切近於身心也如菽粟之療饑布帛之禦寒其不可見不可聞也則冥心力索於章句文字之外恍惚乎古聖人之心嗚呼有王者起而欲復斯民於三代則直舉而措之已矣楊子曰三代而後唐虞其可復矣乎禧對曰唐虞去上古未遠人事開而天氣未漓故其治化與天無間堯典曰黎民於變時雍舜典曰四方風動有非三代之化俗所及故其後雖有禹湯文武之為君益伊尹周呂之為臣而天下

已不可復為唐虞若夫三代之治聖人以人事救之  
蓋自夏商之季浸淫至於周衰其間弑逆烝報凶慝  
姦宄如漢唐以下之變無弗有者故其勢已極於無  
可加當此之時有聖人出焉以救之則為三代之治  
無聖人以救之則為三代以下之亂故曰三代必可  
復也且夫禹湯文武皆大聖人其去堯舜不過幾微  
尺寸之間而不能躋三代於唐虞嘗觀漢唐文帝太  
宗為治萬里昇平四海刑措幾至於三代矣然其立



身致治之道去三代聖人蓋已千百蓓蓓而不可數  
計嗚呼是必世有禹湯文武之為君而其天下亦第  
如漢唐極盛之治而止然後可曰三代不可復耳今  
天下之亂已極其勢必有所變三代極盛之治已數  
千年絕於天下其勢亦宜有所復昔滕文公問井地  
孟子曰有王者起必來取法是為王者師也天生聖  
人為斯民主上以禹湯文武自期其身下志伊尹傳  
說周公之學苟取是書而法之愚以為庶幾得三代

之所以復楊子聞之曰是子之志也汝其以是言弁  
諸冊禧曰唯唯再拜而退 又墓表曰先生諱文彩  
字治文晚號一水學者稱一水先生年未二十即教  
授弟子多至數百人崇禎戊辰用登極恩選貢士先  
生作尚書繹必浣手執筆曰吾方對二帝三王奈何  
不敬書未成先生之屋火噐服盡燬惟書繹存病將  
革執禧手謂曰尚書三吾一人書當見於天下後世  
書凡十二卷

黃氏 宗義 書經筆授

二卷

存

錢氏 肅潤

尚書體要

六卷

存

繆泳曰肅潤字礎日無錫人馬素修先生弟子隱居  
十峰艸堂其說書多本於馬

沈氏嗣選尚書傳

四卷

存

嗣選自序曰乙酉避亂葭川作洪範傳友人勸併及  
全書予謝未遑今歲稍多暇晷欲思著述以自見遂  
有事焉見近世大儒如鄧潛谷郝京山之書非無可  
觀然覺功多而用少者由於句句而疏之也予意因  
文釋義蔡傳已明者不必更為蛇足惟是微言大旨

前賢所未發者潛心弋獲不可使之埋沒乃每篇各作一論其章句之間有獨得者亦疏而記之云

繆泳曰嗣選字仁舉嘉興貢士

閻氏若璩尚書古文疏證

十卷

存

姚氏際恒古文尚書通論別偽例

十卷

存

錢氏煌壁書辨疑

六卷

存

右山陽閻百詩錢塘姚善夫桐鄉錢曉城三家皆攻古文尚書者

毛氏奇齡古文尚書冤詞

八卷

存

右蕭山毛氏見說經者多攻古文尚書之偽  
作此為孔安國梅賾訟寃

欽定四庫全書

卷九十二

經義考卷九十二



欽定四庫全書

經義考卷九十三

翰林院檢討朱彝尊撰

書 二十二

明世宗皇帝書經三要

三卷

未見

黃虞稷曰三要者臯陶謨伊訓無逸三篇也嘉靖四

年十一月帝謂周書無逸一篇與聖祖御注洪範一篇皆治天下大法因命輔臣撰序刊布大學士費宏等言皇上勵精圖治真與聖祖同心一德茲欲刊布亦宜依御注洪範體式因經分注直解肯綮繕寫成書以備觀覽已復有旨再注伊訓及二書分為三冊共為一書宏等請以洪範居首次伊訓次無逸以洪範雖演於箕子而原出夏禹且注自聖祖序之先後宜然已乃帝製洪範序略一篇後將臯陶謨伊訓無

逸等篇通加注釋名曰書經三要

文氏

彥博

尚書二典義

一卷

存

彥博進表曰臣伏觀尚書序曰仲尼討論墳典斷自  
唐虞以下訖於周所以堯舜二典為書之首篇垂世  
立教示人主以軌範帝王之制坦然明白可舉而行  
堯舜二典並云曰若稽古帝堯帝舜以謂二帝並能

順考古道而行之乃知人主之聖必由稽古恭惟皇  
帝陛下日御經筵集講官說尚書蓋聰明文思稽考  
古道垂意於安天下之民天下幸甚臣以衰殘忝位  
保傳得侍經閣為幸已深又不自揆輒於二典之中  
采掇事義數條兼以訓傳或理有切近治體亦以愚  
短之義附之庶幾粗有所備夫以齊之霸國而孟軻  
陳堯舜之道於齊王之前欲勉進之今臣遭堯舜之  
時陳堯舜之道固其宜矣臣愚不勝區區之誠謹錄

以上進

程子

頤堯典舜典解

宋志一卷

存

陸氏

佃二典義

通考一卷

未見

陳振孫曰陸佃農師撰佃為王氏學長於考訂

范氏浚堯典論

一篇

存

羅氏欽順堯典說

一篇

存

汪氏琬九族考

一篇

存

晁氏說之堯典星日歲考

一卷

存載嵩山集

陳氏櫟堯典中星考

一篇

存

貝氏瓊中星考

欽定四庫全書

經  
卷九十三

一篇

存

江南通志瓊字廷臣一字廷琚崇德人領鄉薦張士誠據吳隱於爻山累徵不就洪武三年徵修元史六年除國子助教遷中都國子學助教致仕

程氏廷策中星圖說

一卷

未見



吳氏觀萬閏月定四時成歲講義

佚

徽州府志休寧人字亨壽篤尚考亭之學

來氏汝賢虞書解

未見

毛奇齡曰菲泉來氏汝賢蕭山人嘉靖壬辰進士

袁氏黃虞書大旨

未見

欽定四庫全書

卷九十三

茅氏瑞徵虞書箋

二卷

存

瑞徵自序曰古稱極治唐虞尚矣乃考其時九年之  
洪水每厓其咨七旬之干羽尚煩訓定而猾夏震師  
紀述不絕於書亦烏覩所謂泰寧之象哉其廷臣動  
色相戒一則曰無怠無荒再則曰無若丹朱傲曾未  
嘗以神聖諛其君而其君亦不敢寬然以神聖自命

兢兢業業常若不能一日安於臣民之上故曰堯舜  
其猶病諸只此一念便足千古此帝王相傳之治脈  
也今主上每事誦法堯舜而廷臣將順不遑卒遜處  
於稷契皋夔之後頃歲邊庭告警水旱時聞大似唐  
虞儆予之日惟諸臣共以堯舜事君而無虛以堯舜  
頌君此亦千載一時矣南局多暇日取唐虞論治之  
書讀之意有所會輒次數語簡端久便成帙漫題曰  
虞書箋蓋曰此其最淺淺者予未有知云爾崇禎壬

申

羅氏泌 六宗論

一篇

存 載路史餘論

沈氏頤 象刑解

一篇

存 載唐文粹

程氏大昌 象刑說

一篇

存

朱子熹舜典象刑說

一篇

存

戴氏亨人心道心說

一篇

佚

倪氏思昆命元龜說

一卷

佚

葉紹翁曰寧皇嘉定初拜右相制麻翰林權直陳晦  
偶用昆命於元龜事時倪文節公思帥福閭即束裝  
奏疏謂哀帝拜董賢為大司馬有允執其中之詞當  
時父老流涕謂漢帝將禪位大司馬寧宗得思疏甚  
駭宣示右相右相拜表以為臣一時恭聽王言不暇

指摘乞下思疏以示晦晦翼日除御史遂上章徧舉  
本朝自趙普而下凡拜相麻詞用元龜事至六七且  
謂臣嘗詞放思思非不記此特出於一旦私憤遂  
忘故典以藩臣而議王制不懲無以示後文節遂不  
復敢再辨免所居官陳與真文忠最厚蓋辨明故典  
頗質於文忠云

周密曰嘉定初元史忠獻彌遠拜右丞相相麻翰林  
權直陳晦之筆也有昆命元龜使宅百揆之語時倪

文節思知福州即具申朝省謂昆命元龜此乃舜禹  
揖遜授受之語見於大禹謨非僻書也據漢書董賢  
為大司馬冊文云允執其中蕭咸謂此乃堯禪舜之  
文非三公故事今昆命元龜與允執其中之詞何以  
異若聖上初無是意不知詞臣何從而援引此言受  
此麻者豈得安然而不自明乎給舍臺諫又豈得不  
辨白此事乎竊見曩之詞臣以聖之清聖之和褒譽  
韓侂胄以有文事有武備褒譽蘇師旦然亦未敢用



人臣不當用之語昔歐陽修論韓琦富弼范仲淹立  
黨事在為河北轉運使時故敢援此為比乞行貼麻  
史相得之甚駭遂拜表繳奏且謂當時惟知恭聽王  
言所有制詞會合取會詞臣合與不合貼麻時陳晦  
已除侍御史遂具奏之其詞內云茲方艱於論相顧  
無異於象賢昆命元龜使宅百揆此蓋演述陛下卜  
相之意甚明而思乃以為人臣不當用之語臣觀尚  
書所稱師錫帝曰虞舜與乃言底可績者其上下文

顯是揖遜授受之語而孫近行趙鼎制云亶由師錫之公蔣芾行洪适制云用符師錫之公陳誠之行沈該制云言皆可績僉曰汝諧從大禹謨之文惟口出好興戎朕言不再禹曰枚卜功臣惟吉之從帝曰禹官占惟先蔽志昆命元龜朕志先定詢謀僉同鬼神其依龜筮協從卜不習吉禹拜稽首固辭帝曰毋惟汝諧今以本朝宰相制詞考之呂夷簡制曰或營求方獲或枚卜乃從富弼制曰遂膺枚卜實契具瞻王

欽若制曰廟堂虛位龜筮協謀曾公亮制曰拂龜而  
見祥端辰而定制稽用師言之錫進居台路之先陳  
執中制曰考嘉績而惟茂質枚卜以僉同趙鼎制曰  
龜弗克違既驗詢謀之協陳康伯制曰詢於僉言蔽  
自朕志無非用大禹謨此一段中語此類甚多不敢  
盡舉唐人作韋見素相制曰爾惟不矜朕志先定此  
兩全句皆用禹事本朝蘇軾草賜范純仁詔亦曰蔽  
自朕志賜文彥博詔亦曰朕命不再至於歷試諸難

蓋堯舜事軾於吕大防胡宗愈詔屢用歷試二字然臣不敢援此為例恐未是命龜的證國初趙普拜相制曰詢於元龜歷選羣后又有甚的切者唐元和中裴度拜相制曰人具爾瞻天方資予昆命元龜爰立作相云云古人舉事無大小未嘗不命龜如洪範周禮左傳皆可攷也今思乃以董賢冊文允執其中為比以聖上同之漢哀云云凡臣所陳事理甚明所有已降相麻郎不合貼改繼得旨陳晦援證明白無罪

可待倪思輕侮朝廷肆言誣罔可特降兩官其後文  
節作辨析一狀甚詳又專作一書曰昆命元龜說備  
載始末然一時公論多以文節出位而言近於忿激  
而陳之論辨雖詳終不若不用之為佳也

王氏惲百獸率舞說

一篇

存

漢禹貢圖

一卷

佚

後漢書王景傳永平十二年議修汴渠乃引見景問  
以理水形便景陳其利害應對敏給帝善之又以嘗  
修浚儀功業有成乃賜景山海經河渠書禹貢圖及  
錢帛衣物

裴氏秀禹貢地域圖

十八篇

佚

晉書裴秀字季彥河東聞喜人武帝受禪官尚書令  
左光祿大夫久之以為司空秀儒學洽聞職在地官  
以禹貢山川地名從來久遠多有變易後世說者或  
彊牽引漸以暗昧於是甄摘舊文疑者則闕古有名  
而今無者皆隨事注列作禹貢地域圖十八篇奏之  
藏於秘府

秀自序曰圖書之設由來尚矣自古立象垂制而賴

其用三代置其官國史掌厥職暨漢屠咸陽丞相蕭何盡收秦之圖籍今秘書既無古之地圖又無蕭何所得惟有漢時輿地及括地諸雜圖各不設分率又不考正準望亦不備載名山大川雖有麤形皆不精審不可依據或荒外迂誕之言不合事實於義無取大晉龍興混一六合以清宇宙始於庸蜀深入其阻文皇帝乃命有司撰訪吳蜀地圖蜀土既定六軍所經地域遠近山川險易征路迂直校驗圖記罔或有



差今上考禹貢山海川流原隰陂澤古之九州及今  
之十六州郡國縣邑疆界鄉閭及古國盟會舊名水  
陸徑路為地圖十八篇制圖之體有六焉一曰分率  
所以辨廣輪之度也二曰準望所以正彼此之體也  
三曰道里所以定所由之數也四曰高下五曰方邪  
六曰迂直此三者各因地而制宜所以校夷險之異  
也有圖象而無分率則無以審遠近之差有分率而  
無準望雖得之於一隅必失之於他方有準望而無

道里則施於山海絕隔之地不能以相通有道里而無高下方邪迂直之校則徑路之數必與遠近之實相違失準望之正矣故以此六者參而攷之然遠近之實定於分率彼此之實定於道里度數之實定於高下方邪迂直之筭故雖有峻山鉅海之隔絕域殊方之迴登降詭曲之因皆可得舉而定者準望之法既正則曲直遠近無所隱其形也

顧氏愷之夏禹治水圖

一卷

佚

宣和畫譜顧愷之字長康小字虎頭無錫人義熙中  
為散騎常侍今御府所藏有夏禹治水圖

無名氏禹貢圖

二卷

佚

右見唐裴孝源貞觀公私畫史

孔氏武仲禹貢論

一篇

存

毛氏晃禹貢指南

二卷

未見

按文淵閣書目有禹貢指南一冊不著撰人姓名疑即晃書昆山葉氏菴竹堂目亦有之

程氏大昌 禹貢論

宋志五卷 萬卷堂目二卷

存

禹貢論圖

宋志五卷 萬卷堂目二卷

未見

禹貢後論

宋志一卷

未見

彭椿年序曰禹迹所及周遍天下而載之禹貢者僅餘千言其施置閭大而書法嚴簡絕非一見可以遽解故薦紳先生難言之漢永平間詔遣王景治汴而賜以禹貢圖曰圖云者為其道里悠遠功緒汗漫故圖以著之則禹貢有圖其已久矣予嘗恨古圖不存歷世諸儒耳受臆決無所稽據每對禹貢輒闕然不滿紹興初肇復大學與今泉守程公偕冠而中弟子

員俱業書又適同一舍每相與談經至不安處輒共  
嘆諸儒之說未能通貫時方事場屋作舉子文字未  
暇究竟也淳熙四年程公以侍從講尚書禁中門下  
省頒行其奏劄曰禹貢大川七而諸儒沿襲乃譌其  
六予聞之有會於心而疑其是正之難也已而聞上  
御講殿問黑水甚詳知公有見俾之來上程公具以  
其所知為書以奏上見之大加褒勞詔付秘書省藏  
以垂後予聞諸學士大夫稱其精博實未嘗一見其

書也六年出管閩舶明年而程公以敷文閣直學士  
來鎮泉南暇日論文因請觀之程公欣然出副本相  
示予取以歸熟而復之則其書條理甚備辨正經指  
者著之於論論凡五十有二論嘗指事說理而當證  
以山川實地者則事為之圖圖三十有一至其事不  
隸虞夏而源流本出此經者則又為後論八篇數千  
年間州域更革山川迹道率皆本禹語以為之宗而  
後采取歷世載籍以為之證其所據謂是者必其協



諸經而協乃始皆措而其救正前人違悞者亦皆稽  
紫經語而執規矩以格方圓其不合者有狀而指自  
出若語也至於執以為據者惟輿圖史志之所載兵  
師使驛之所經實有其地甫以立辨至於裨說怪語  
奇聞異教荒忽誕謾不可案核者悉棄不取嗚呼亦  
勤矣而無一語不從禹貢以出予乃知衆稱精博者  
不誣也若九河之淪於海三江之當為一嘉陵江誤  
為西漢而漢中之漢本無二派濟水通溢為榮而濟

之為濟實非潛行地下弱水之既西黑水之入南歷  
世禹河漢河之別貢道入河入荷之誤以其言而質  
之禹貢若合符節無所差爽予始念孟子之言曰天  
之高也星辰之遠也苟求其故千歲之日至可坐而  
致也程公之於地理禹迹可謂求之而知其故也矣  
是可傳也且其奏御之語曰東西朔南漸被聲教皆  
自此規摹以出則其拳拳不獨為夏世故書發語而  
已聖天子亦既知其志之不狹矣從而褒諭之曰禹

貢於古今山川地理無不該貫最為難明鄉著論以  
要其歸為功甚大則所得褒寵亦不止義訓之近也  
郡博士陳君應行請以其著刻木郡庠布之學者而  
求予文為表予不容辭故為之書

陳應行後序曰閣學尚書程公曩在經筵進黑水之  
說上動天聽因以禹貢為論為圖啓沃帝心且以東  
漸西被教暨朔南為惓惓之忠盡在於此嗚呼大哉  
言乎其本藏之秘館天下學者欲見而不可得歲在

庚子公以法從出守溫陵而編修彭公提舶於此與公有同舍之舊得其副本應行一日摳衣彭公之門質疑之餘出示書一編曰此程公所進禹貢論圖也子見之乎因再拜以請而三復其說見其議論宏博引證詳明皆先儒之所未及乃請於公願刊之郡庠以與學者共之公曰是吾志也乃出公帑十五餘萬以佐其費復請公序以冠其首凡所畫之圖以青為水者今以黑色與水波別之以黃為河者今以雙黑

線別之古今州道郡縣疆界皆畫以紅者今以單黑  
線別之舊說未安今皆識之以雌黃斷線別之斯文  
一傳使學者觀帝王之疆理見宇宙之寥廓感慨今  
昔皆有勒功燕然之心則閱此書者豈小補哉淳熙  
辛丑上元後五日

大昌自序曰臣惟帝王臨御天下凡四海九州之面  
勢名山大川之向背九夷八蠻之區域必先究其曲  
折表裏然後宅撫大略得以審所施置而效之於事

禹之出也其所遭者水也故其經畫必以奠高山大川為始蓋高山既奠則避礙有方大川不迷則濬距有向是以功力所及地平天成不愆於素知所指而措之釐無不宜也今具載之禹貢雖曰主為水後而區處夷夏播敷政教使四海得為唐虞其遺範所詔蓋帝王必當取法者也孔子採錄而紀之書豈直為行河者之地哉大有為之主將陟禹迹以方行天下是書也即禹輿地圖志而可稽者矣然而極天下大

川如江淮河漢濟黑水弱水此七者宇宙不能越之  
以自大禹功不能外之以自立而其名稱迹道世傳  
失實七繆其六人主苟欲追會禹蹟而不得七者之  
真正猶禹之行水高山大川其猶未奠而欲行其荒  
度則將何據以為施置之序也然則士而考古以待  
有國者之採擇推諸世務宜無要於此書者矣然去  
古益遠簡編不與禹接其辨正實難顧有一者經文  
雖簡而於事情無所不該如即其簡而得其該則雖

茫茫之迹見於千餘言亦既無所乏少若但病其簡  
言外輒無餘見必且越而求之經文之外說成而經  
不應則於稽據何賴臣為此故方其疑悟古說則盡  
屏訓傳獨經文而熟復之研味既久忽於一言一字  
之間覺其意指可以總括後先則主以為據而益加  
叅校暨其通之一經而合質之旁史而信稽諸人情  
物理而準於是躍然喜渙然悟知甚簡之中有甚該  
者焉如人有脈繇繇若存可以精察而不可以亟見



然後知聖經之異於凡史也積其所見撰次成論凡五十有一篇豈敢謂能有明然章而習之白首不知止亦冀施之實用不徒為此空言爾臣近因進講黑水遂得陳道其素聖明盡下不以為愚而寵褒之且宣諭臣曰禹貢於古今山川地理無不闢貫最為難明卿著論以據證之用功甚矣嘉賞至於再三俾之來上臣恭稟睿訓豈敢以淺陋為辭謹具所著論繕寫塵獻夫其淺聞而博考居千百世後而討究前人

之未安持竅啓之見以敷露於天縱聖學之前極自知其不量然千慮之愚或庶幾其一得者率皆本經而求之傳會傳而反諸經因禹貢以言禹貢未始舍經而自出一見以此致之君上非臣之敢為若言也禹也書叙載其經啓功用曰東漸于海西被于流沙朔南暨聲教臣惓惓所願效忠者正在此語也若夫山川方域散在四海而名稱迹道不啻千百其變臣所著論撮總其事而不能縷陳其方鄉位置則別為

之圖以表著之苟蒙采擇庶幾便於省覽 又自序  
後論曰臣惟禹之水功被賴萬世而大河特不輟為  
治世之患較其勞費殆若一敵國然而民又未嘗得  
寧也汴渠規模不出於禹而轉輸之利愈於未有汴  
時臣以是知天下事其迹狀未形於前則雖聖人亦  
無所感發以出其智故周監二代而文物郁郁漢創  
笞杖徒流以代肉刑而百世遂不可易蓋見其形而  
後知所措也臣本為稽攷禹貢而及古今山川曲折

於是念河汴二水本朝極嘗闢意而其間應講求以脩稽用者實云有之輒隨見記錄以為禹貢後論比因奏對忝蒙睿旨宣取臣不敢以愚陋為辭謹此錄進夫事未至而逆知其理之當然則事至而策畫審定此臣區區愚誠也

陳振孫曰凡論五十三篇後論八篇圖三十一其於江河淮漢濟黑弱水七大川以為舊傳失實皆辨證之淳熙四年上進宇宙廣矣上下數千載幅員數萬

里身不親歷耳目不親聞見而欲決於一心定於一  
說烏保其皆無牴牾然要為卓然不詭隨傳注者也  
中興書目禹貢論五卷後論一卷專論河汴二水之  
患又禹貢論圖五卷因禹貢脩論歷代山川郡縣名  
稱改易以唐世地書為正

王應麟曰淳熙四年七月刑部侍郎程大昌上禹貢  
論五十二篇後論八篇詔付祕閣

周密曰程泰之以天官兼經筵進講禹貢闕文疑義

疏說甚詳且多引外國輿地地理阜陵頗厭之宣諭  
宰執云六經斷簡闕疑可也何必強為之說且地理  
既非親歷雖聖賢有所不知朕殊不曉其說想其治  
銓曹亦如此也既而補外

歸有光跋曰禹貢論五十二篇得之魏恭簡公而亡  
友吳純甫家藏有禹貢圖皆淳熙辛丑泉州舊刻也  
泰之此書世稱其精博然予以為山川土地非身所  
履終無以得其真太史公言張騫窮河源烏覩所謂

崑崙者元世祖至元十七年使驛治運河土番朶甘  
斯西鄙星宿海所謂河源者始得其真如秦之所辨  
鳥鼠同穴數百言以為二山而吾郡都太僕常親至  
其山見鳥鼠來同穴乃知宇宙間無所不有不可以  
臆斷也

王氏炎禹貢辨

一卷

未見

經義考卷九十三